

दिनांक 03.01.2025

समय: 18.45 बजे

- मुख्यमंत्री भजनलाल शर्मा जयपुर रो नुवो मास्टर प्लान बणावण माथे ज़ोर दीनो –विकास रा कामां रो जायजो लीनो।
- सुपोषित मां अभियान रो तीजो दौर सरु व्ह्यो – आस वाळी डोढ़ हजार महिलावां ने पोषण किट दिया ज्या।
- विधानसभा अध्यक्ष वासुदेव देवनानी सदन रा लारला सत्र रा बच्योड़ा सवालां रो विभागवार जायजो लीनो।
- उदयपुर मांय गोगुंदा-पिंडवाड़ा हाईवे माथे व्ह्या सड़क हादसा मांय पांच जणां री मौत अर आठ जणां ज़ख्मी।
- राज्य सरकार सरकारी स्कूलां मांय अंग्रेजी मांय भणाई रा पैली वाळी सरकार रा फैसला माथे ओजू विचार करेला।

000

मुख्यमंत्री भजनलाल शर्मा जयपुर रो नुवो मास्टर प्लान बणावण माथे ज़ोर दीनो है। श्री शर्मा सांगानेर विधानसभा हलका मांय कराया जा रह्या विकास रा कामां रो जायजो लेवण सारु आज जयपुर मांय वां रा रेहवास माथे राखी ज्यी मीटिंग मांय बोल रह्या हा। वे कह्यो के बधती आबादी रे कारण साधनां माथे दबाव बध रह्यो है, ज्यीं कारण नगर नियोजन री ओजू ज़रूरत है। मुख्यमंत्री पीडब्ल्यूडी अर एनएचआई रा अहलकारां ने जयपुर कने भांकरोटा मांय बण रह्या फ्लाईओवर रो काम बेगो पूरो करण बाबत कह्यो। श्री शर्मा पीडब्ल्यूडी रा अहलकारां ने 200 फीट बाईपास कने फ्लाईओवर अर अंडरपास बणावण अर बीलवा फ्लाईओवर बणावणो तैय करण रा हुकम दीना। मुख्यमंत्री रीको पुलिया ऊं मालपुरा रेलवे फाटक ताई सड़क चौड़ी करण रो काम बेगो पूरो करण बाबत ई कह्यो। मुख्यमंत्री अहलकारां ने प्रतापनगर मांय 132 केवी जीएसएस बणावण अर बिजली री लेणां जमीं हेटे करण रा बारा मांय ज़रूरी हुकम ई दीना।

000

कोटा-बूंदी संसदीय हलका मांय आज सुपोषित मां अभियान रो तीजो दौर सरु करी ज्यो। लोकसभा अध्यक्ष ओम बिरला सागे उपमुख्यमंत्री अर महिला अर बाल विकास मंत्री दिया कुमारी इण री सरुआत कीनी। अभियान रा तैत आस वाळी डोढ़ हजार लुगाइयां ने पोषण किट दिया ज्या। ई रा तैत आस वाळी महिलावां ने मुफ्त दवाइयां अर डॉक्टरी राय ई दी जावेला। ई सागे ई वां रे ज़रूरी टीका ई लगाया जावेला। पेट मांय पळ रह्या बाळक अर मायड़ां रा स्वास्थ्य ने समर्पित ई अभियान री सरुआत रे मौके श्री बिरला कह्यो के स्वस्थ मां ऊं ई स्वस्थ समाज बण सके है।

कार्यक्रम मांय उपमुख्यमंत्री दिया कुमारी कह्यो के आस वाळी लुगाइयां ने ज़रूरी पोषण मुहैया करावण अर वां रा स्वास्थ्य री हिफाज़त सगळां री ज़िम्मेदारी है। वे कह्यो के राज्य रा आवता बजट मांय महिलावां रा स्वास्थ्य सारु खास व्यवस्था करण बाबत मुख्यमंत्री सागे चर्चा करी जावेला।

000

केन्द्रीय संस्कृति अर पर्यटन मंत्री गजेन्द्र सिंह शेखावत जंगलात हलका अर जिनावरां री हिफाज़त ने जनता रो अभियान बणावण बाबत कह्यो है। वे आज जोधपुर मांय 119वीं फोरेस्ट गार्ड पासिंग आउट परेड रे मौके बोल रह्या हा। इण ऊं पैली जोधपुर हवाई अड्डा माथे श्री शेखावत खबरनवीसां ऊं कह्यो के सरकार सैर-सपाटा री नुवी ठौड़ां विकसित करण री कोशिशें कर रही है।

000

प्रधानमंत्री नरेन्द्र मोदी सूफी संत ख्वाजा मोईनुद्दीन हसन चिश्ती रा 813वां उर्स री बधाई दीनी है। श्री मोदी अल्पसंख्यक कार्यमंत्री किरें रिजिजू ने एक चादर ई दीनी, ज्यो काल अजमेर मांय दरगाह शरीफ माथे पेश करी जावेला। ई मौके प्रधानमंत्री सगळां री ज़िंदगी मांय खुशहाली अर शांति री कामना कीनी। अल्पसंख्यक कार्यमंत्री रो दरगाह रा वेब पोर्टल अर गरीब नवाज एप री सरुआत करण रो ई कार्यक्रम है। उर्स मांय सिरकत करण सारु देश-परदेश ऊं मोटी तादाद मांय ज़ायरीन अजमेर पूग रह्या है। उर्स मांय आवण वाळा ज़ायरीन री मोटी तादाद ने ध्यान राखता थकां ज़िला प्रशासन अर पुलिस ज़रूरी इंतजामात कीना है।

000

विधानसभा अध्यक्ष वासुदेव देवनानी सदन रा प्रश्नोत्तर अर दूजा विधायी कामकाज रा बारा मांय आज मुख्य सचिव सुधांशु पंत अर दूजा आला अहलकारां सागे मीटिंग कीनी। वे न्यारा-न्यारा महकमां री ओर ऊं सवालां रो जवाब नी आवण रे कारणां री विगतवार जाणकारी लीनी। देवनानी कह्यो के विधानसभा ने राज्य सरकार रा न्यारा-न्यारा महकमा ऊं सवालां रो जवाब नी मिलण ऊं विधानसभा रा प्रक्रिया अर कार्य संचालन नियमां रो उल्लंघन व्हे है।

000

केन्द्रीय पर्यावरण मंत्री भूपेन्द्र यादव आज वां रा संसदीय हलका अलवर रा तिजारा मांय चंद्रप्रभु जैन मंदिर मांय नुवी बणायी ज्यी भोजनशाला अर यात्री निवास जनता ने सूप्या। वे कुतीना गांव मांय शहीद कंवरपाल सिंह चौहान री याद मांय राख्यी ज्या कार्यक्रम मांय ई सिरकत कीनी। ई मौके श्री यादव नौजवानां ऊं राष्ट्र प्रथम अर अनुशासन री भावना ऊं काम करण बाबत कह्यो।

केन्द्रीय मंत्री आज खैरथल मांय राख्यी ज्या सांसद खेल उत्सव मांय ई शिरकत कीनी।

000

राज्य सरकार सरकारी स्कूलां मांय अंग्रेजी मांय पढ़ाई करावण रा प्रदेश री पैली वाळी गहलोत सरकार रा फैसला माथे ओजू विचार करेला। ई सारू उपमुख्यमंत्री डॉ. प्रेमचंद बैरवा री सदरत मांय मंत्रिमंडलीय उपसमिति बणायी ज्यी है। मंत्रिमंडलीय सचिवालय ई बाबत हुकम जारी कर दीना है। समिति मांय चिकित्सा मंत्री गजेंद्र सिंह खींवरसर, शिक्षा मंत्री मदन दिलावर अर खाद्य मंत्री सुमित गोदारा ने सदस्य बणायी ज्या है।

000

उदयपुर जिला मांय गोगुंदा-पिंडवाड़ा रा बेकरिया हलका मांय आज ट्रैलर अर टेम्पो री टक्कर रे कारण व्हा हादसा री वजह ऊं पांच जणां री मौत व्हे ग्यी अर आठ जणा जखमी व्हे ग्या। नेशनल हाइवे नम्बर-27 माथे व्हा ई हादसा रे कारण टेम्पो मांय सवार तीन महिलावां अर एक बाळक री मौके ई मौत व्हे ग्यी, जदके एक जणा री ईलाज सारू ले जाती बगत गेला मांय मौत व्हे ग्यी। जखमी व्हा दूजा जणा ने अस्पताल मांय भर्ती करायी ज्या है। मुख्यमंत्री भजनलाल शर्मा ई हादसा मांय लोगां रे मरण परां दुःख जतायो है। वे अहलकारां ने जखमी लोगां रो जरूरी ईलाज तैय करण रा हुकम दीना।

000

राष्ट्रीय सड़क सुरक्षा माह रा तैत राज्य मांय न्यारा-न्यारा कार्यक्रम राख्या जा रह्या है। आज झुंझुनूं मांय बेसहारा पशुआं रे रेडियम वाळी पट्टियां बांधी ज्यी। ई सारू जिला पर्यावरण सुधार समिति सात हजार बेल्ट मुहैया करायी है। डूंगरपुर मांय चलायी ज्या जागरूकता कार्यक्रम रे दौरान एस.पी. लोगां ने गुलाब रा फूल दे र यातायात नियमां री पालना री अपील कीनी। वे स्कूटर-मोटरसाइकिल चलाती बगत हेलमेट लगावण अर कार-जीप चलाती बगत सीट बेल्ट लगावण बाबत ई कह्यो। सवाईमाधोपुर मांय खास चौराहां अर सार्वजनिक ठोडां यातायात जागरूकता सामग्री रो दरसाव करी ज्यो है। **जालौर** मांय जिला कलेक्टर डॉ. प्रदीप के. गावंडे आज वां रा दफ्तर सामी हेलमेट पहर्यां बगैर स्कूटर-मोटरसाइकिल चलावण वाळां अर बिना सीट बेल्ट लगायां कार-जीप चलावण वाळां ने गुलाब रा फूल दे र समझाईश कीनी। राष्ट्रीय सड़क सुरक्षा माह रा तैत भारी वाहनां, ट्रैक्टर-ट्रौली अर टैंकर समेत न्यारा वाहनां माथे चमकण वाळी टेप लगायी ज्यी।

000

प्रदेश मांय साइबर अपराधां री रोकथाम सारू **“ऑपरेशन साइबर शील्ड”** अभियान चलायी ज्यो है। पुलिस रा साइबर अपराध महानिदेशक हेमंत प्रियदर्शी बतायो के 31 जनवरी ताई चालण वाळा ई अभियान रे दौरान साइबर अपराध ऊं जुड़्या मामलां रा निपटरा सागे जनता मांय साइबर हिफाजत रा प्रति जाग जगायी जावेला।

000

झुंझुनूं जिला रा आबूसर मांय आज **शेखावाटी हस्तशिल्प अर पर्यटन मेळा** सुरू व्ह्यो। दस दिन रा ई मेळा रो उद्घाटन झुंझुनूं रा विधायक राजेंद्र भांबू अर जिला कलेक्टर रामावतार मीणा कीनो। मेळा मांय देश रा न्यारा-न्यारा हलकां ऊं आया कारीगरां री हाथ री कारगरी ऊं बणायी ज्या सामान री करीब अढाई सौ स्टॉल्स लगाई ज्यी है। मेळा मांय न्यारी-न्यारी होड़ां अर सांस्कृतिक कार्यक्रम ई राख्या जा रह्या है।

000

केकड़ी मांय चाल रही 10वीं अखिल भारतीय हॉकी होड़ रा दूजा दिन आज राजस्थान पुलिस पठानकोट पंजाब री टीम ने 2-0 ऊं हरा दीनी। दिल्ली फाइटर सवाईपुर हॉकी माथे 3-0 ऊं जीत दर्ज कीनी। हॉकी कोटा रे खिलाफ जबलपुर री टीम 1-0 ऊं मुकाबलो जीत्यो। सोनभद्र री टीम भीलवाड़ा ने 4-0 ऊं हरायो।

000